



JUDICIAL SYSTEM MONITORING PROGRAMME
PROGRAMA DE MONITORIZAÇÃO DO SISTEMA JUDICIAL

Komunikadu Imprensa

Periodu : Maiu 2011

Edisaun : 25 Maiu 2011

**JSMP Habelar Prosesu Lejislativu Iha Suku Bibileo Distritu
Viqueque**

Iha loron 19 Maiu 2011, Judicial System Monitoring Programme (JSMP) atraves husi Sub Unidade Programa Observasaun Parlamentu (POP), hala'ó workshop loron ida konabá prosesu lejislativu no alterasaun lei N^ú 6/2006 Lei Eleitorál ba Parlamentu Nasionál iha Suku Bibileo, Distritu Viqueque.

Objetivu husi workshop ne'e atu habelar no hakbiit liu tan povu nia koñesimentu konabá knaar Parlamentu Nasionál nian atu oinsá povu bele partisipa iha prosesu lejislativu no elisaun Prezidensial no Parleментар iha 2012, tinan ida tuir mai.

Diretór Interinu JSMP, Casmiro dos Santos esklares katak, *tuir artigu 92 Konstituisaun Repúblika Demokratika Timór Léste defini katak, Parlamentu Nasionál mak órgaun soberania Repúblika Timór Léste nian ne'ebé reprezenta ema Timór oan tomak, iha kbiit atu halo lei, atu fiskaliza no halo desizaun politika.*

Refere ba artigu ne'e komunnidade iha áreas remotas, persija duni atu koñese no hatene diak liu tan oinsá prosesu halo lei, no oinsá sidaudaun hotu-hotu bele partisipa iha vida polítika bazeia ba Konstituisaun no alterasaun Lei ba Eleisaun Parlamentu Nasionál ne'ebé foin aprova iha loron 4 fulan Maiu 2011 liu ba. Tanbá lei ne'e importante tebes ba povu Timór Léste tomak inklui komunnidade iha área remotas.

Depoide partisipante sira rona tiha esplikasaun husi JSMP, partisipante sira kompriende liu tan konabá knaar ou servisu husi membrus Parlamentu Nasionál nian, no sira fo rekomendasaun ba membrus Parlamentu Nasionál sira katak, aleinde fiskaliza servisu Governu nian, membru Parlamentu Nasionál nian mós persija halo fiskalizasaun ba povu sira iha áreas remotas inklui suku Bibileo, atu nune'é sira bele harê direktamente oinsá povu nia susar iha área ne'ebá. Partisipante sira mós rekomena katak membrus Parlamentu Nasionál sira, la bele hakbesik aan deit ba povu wainhira iha tempu kampaña polítika ba eleisaun nian, no wainhira hetan ona pozisaun haluhan tiha povu ne'ebé mak hili sira.

Preokupasaun ne'e hato'ó rasik husi partisipante sira, nomós Suplente Xefe Suku Bibileo. Tuir observasaun, JSMP nota katak komunnidade iha suku ne'e entuziasmu no ativu tebes durante workshop refere. Tuir loloos bázeia ba planu, JSMP prezisa deit partisipantes ema nain 30 atu

partisipa iha workshop refere, maibé iha realidade suplente Xefe Suku rasik propoin atu fasilitador la bele limite número partisipantes.

Workshop ne'e realiza tanbá hetan apoiu finanseiru husi USAID servisu hamutuk ho *The Asia Foundation* (TAF)

Atu hetan informasaun kle'an favor kontaktu:

Casmiro dos Santos

Diretór Interinu JSMP

Diresaun e-mail: casmiro@jsmp.minihub.org

Landline: 3323883